


Tagumpay kay Cristo Hesus



Tinipon ni Watson Goodman

Walang bayad—hindi ipinagbibili

Tagumpay kay Cristo Hesus

Satanas, ipinahayag sa mga salita ng Diyos na, prinsipal ng sanglibutan, ang mahigpit na kaaway ng Diyos-bagaman siya ang pinakamataas sa lahat ng nilalang-tao. Tayong mga tao ay nakaharap sa isang mapanganib na larangan ng pakikilaban. Nagngangalit ang paglalaman ng dalawa, ni Cristo at si Satanas. Kailangang piliin natin kung sino ang ating talagang Panginoon magpakailan man. Si Cristo ang Manglilalang, na siyang Emmanuel (Sumasaatin ang Diyos) o si Satanas ang nilalang-na siyang prinsipal ng lahat ng paghihimagsik laban sa Diyos. Sa pamamagitan ng Kanyang kamatayan at pagkabuhay na maguli nagtagumpay si Cristo para sa lahat ng sumampalataya sa Kanya.

Sa maraming pagkakataon tinangka ni Satanas na dayain, iligaw ang mga tao at ang pinakahuli ay ang tungkol sa pagsamba. Si Cristo na manglilalang ang karapatdapat sambahin. Nakikilala tayo sa Kanya na ating sinasamba. Ang kahulihulihang pagtatangka na bihagin ang mga tao sa sanglibutan ay ang mga ito: (1) kalayaang hiwalay sa Diyos, (2) pagsunod sa diablo, (3) pagsamba sa “tao ng sala,” (4) pagsamba sa kanyang larawan, (5) tanda sa katawan upang makabili at makapagbili. Mag-ingat sa mga bagay na ito. —Watson Goodman (1920-2002)

ANG DIYOS AY HINDI LUMIKHA NG KAAWAY 1

*Nilalang ng Diyos si Lucifer na may-
rong mataas na tungkulin sa langit*

Sinabi sa akin ni Yahweh: "...
Ikaw ay larawan ng kasakdalan.
Puspos ng kaalaman. Ang ganda
mo'y walang kapintasan. Tulad
mo'y nasa paraiso ng Diyos,
sa hardin ng Eden. Nababalot
ka ng iba't ibang uri ng batong
mamahalin: sardiyo, topaz at
diyamanteng nagniningning; be-
rilo, onise at jasper na walang
kahambing; safiro, esmeralda
at karbungko. Ginto ang iyong
enggasto. At ang pagkaukit dito
ay inihanda noong una pa, nang
isilang ka sa mundo."

Malapit sa luklukan ng Diyos
"Kerubin ang itinalaga kong
magbabantay sa iyo. Nasa ituk-
tok ka ng aking banal na bundok.
Ang nilalakaran mo'y mga ba-
tong kumikinang."

Nilalang na Sakdal

"Wala kang kapintasan mula pa
nang isilang hanggang sa mai-
sipan mong mamuhay sa kasa-
maan."

Inihagis ng Diyos ang Kasalanan

"Nang lumakas ang kalakal mo,
natuto kang sumuway at namu-
hay sa kasalanan. Kaya, ipinag-
tabuyan ka mula sa aking banal
na bundok." —Ezekiel 28:11-16a

2 ANO ANG NAGSULSOL KAY LUCIFER UPANG MAGKASALA?

Ang kapalalua'y humahantong sa pagkawasak, at ang mapagmataas na isipan ay ibabagsak.

—Kawikaan 16:18

Naging palalo ka dahil sa iyong kagandahan. Ginamit mo sa kasamaan ang iyong karunungan para mapatatag ang iyong katayuan. Kaya ibinagsak kita sa lupa upang maging babala sa ibang mga bansa.

*Ang kapalaran ng
Mapanghimagsik*

Dahil sa masamang pamamaraan ng iyong pangangalakal, nasalaula ang Templo at nadu-

mihan. Kaya ipinatupok kita sa apoy. Nilamon ka nga nito at nakita ng lahat na ikaw ay naging abo. —Ezekiel 28:17, 18

*Bawat Nilalang ay dapat
Mapailalim sa Lumalang*

Si Yahweh ay papurihan, paglingkuran siyang kusa; lumapit sa presensya niya at umawit na may tuwa! O si Yahweh ay ating Diyos! Ito'y dapat na malaman, tayo'y kanya, kanyang lahat, tayong lahat na nilalang; lahat tayo'y bayan niya, kabilang sa kanyang kawan. —Awit 100:2, 3

PAGPAPAHAYAG NI LUCIFER NG PAGSASARILI 3

Kalooban Niyang laban sa Diyos

“O Maningning na Bituin sa umaga, anak ng Bukang-liwayway! Bumagsak ka rin sa lupa, at nahulog mula sa langit. Ikaw na nagpasuko sa mga bansa! Hindi ba’t sinabi mo sa iyong sarili? ‘Aakyat ako sa langit; at sa ibabaw ng mga bituin ng Diyos, ilalagay ko ang aking trono. Uupo ako sa ibabaw ng bundok na tagpuan ng mga diyos sa malayong hilaga. Aakyat ako sa ibabaw ng mga ulap, papantayan ko ang Kataas-taasan.’ ”

*Mga Gawang naging
Kapahamakan sa lupa*

“Ngunit anong nangyari at nahu-

log ka sa daigdig ng mga patay? Sa kalalimang walang hanggan? Pagmamasdan ka ng mga patay at magtatanong ang mga ito: ‘Hindi ba ang taong ito ang nagpayanig sa lupa, at nagpabagsak sa mga kaharian? Hindi ba’t winasak niya ang buong daigdig, at nilupig ang mga lunsod, ang taong ayaw palayain ang mga bilanggo? Lahat ng hari ng mga bansa’y mahihimlay sa magagara nilang puntod. Ngunit ikaw ay hindi ililibing sa iyong libingan, ang bangkay mo’y itatapon na parang sangang walang kabuluhan.’ ” —Isaias 14:12-19a

4 PAGESASARILING HIWALAY SA DIYOS AY KAMATAYAN

Mga una ni Lucifer

(Tingnan ang limang salitang “Ako” sa Isaias 14:13, 14 sa pahina 3.)

Sinabi sa kanila ni Jesus, “Nakita kong parang kidlat na nahu-log si Satanas mula sa langit.”

—Lucas 10:18

Sa mga Anghel na sumunod kay Satanas

Hindi pinatawad ng Diyos ang mga anghel na nagkasala. Sila’y itinapon sa impiyerno kung saan sila’y iginapos sa kadiliman upang doon hintayin ang Araw ng Paghuhukom. —2 Pedro 2:4

Sa mga taong maaaring dayain ni Satanas

Hindi siya dapat isang baguhang mananampalataya; baka siya’y maging palalo at mahatulan na gaya ng diyablo. —1 Timoteo 3:6

Isa lamang ang kalooban sa, langit, kalooban ng Diyos

Huwag kayong makiayon sa takbo ng mundong ito. Sa halip, hayaan ninyong baguhin ng Diyos ang inyong pag-iisip upang maunawaan ninyo ang kanyang kalooban. Sa gayon, magagawa ninyo kung ano ang mabuti, kalgugud-lugod at ganap na kalooban ng Diyos. —Roma 12:2

KARAPATAN NG DIYOS SA LAHAT NG PAGSAMBA 5

“Ako si Yahweh, ang iyong Diyos na naglabas sa iyo sa Egipto at nagpalaya sa iyo mula sa pagkaalipin. Huwag kang sasamba sa ibang diyos, maliban sa akin.” —Deuteronomio 5:6, 7

Kilalanin ng lahat maluwalhati niyang pangalan, bawat isa’y lumapit at siya ay handugan. Sambahin si Yahweh sa diwa ng kabanalan. —1 Cronica 16:29

Kaya’t sumagot si Jesus, “Lumayas ka Satanas! Sapagkat nasusulat, ‘Ang Panginoon mong Diyos ang dapat mong sambahin. At siya lamang ang dapat mong

paglingkuran.’” —Mateo 4:10

Tayo na’t lumapit, sa kanya’y sumamba at magbigay-galang, lumuhod sa harap ni Yahweh na siyang sa ati’y may lalang. (*Basahin Genesis 1:27.*) —Awit 95:6

Ang mga nadaya sumamba sa kaaway

...Namangha ang buong daigdig sa nangyaring ito, at nagsisunod sila sa halimaw. Sinamba ng lahat ng tao ang dragon sapagkat ibinigay nito ang kanyang kapangyarihan sa halimaw. Sinamba rin nila ang halimaw....

—Pahayag 13:3b, 4a

6 HUWAG SAMBAHIN ANG KAAWAY NG DIYOS

Pinakahahangad ni Satanas na sambahin siya

Pagkatapos, dinala siya ng diyablo sa isang napakataas na bundok at ipinakita sa kanya ang lahat ng kaharian sa daigdig at ang karangyaan ng mga ito. Sinabi ng diyablo sa kanya, “Ibibigay ko sa iyo ang lahat ng ito kung magpapatirapa ka at sasamba sa akin.” —Mateo 4:8, 9

Ang natira sa sangkatauhan na hindi namatay sa mga salot na ito ay hindi nagsisi. Hindi sila tumalikod ni tumigil man sa pagsamba sa mga demonyo at sa mga

diyus-diyosang ginawa ng kanilang kamay, mga larawang ginto, pilak, tanso, bato at kahoy, na di nakakakita, nakakarinig o nakakalakad man. —Pahayag 9:20

Wawasakin ng Diyos ang ganitong mananamba

...At nagkaroon ng mahahapdi at nakakapandiring pigsa ang mga taong may tatak ng hali-maw at sumamba sa larawan nito. ...Hinatulan ang lahat ayon sa kanilang mga ginawa. Pagkatapos ay itinapon din sa lawa ng apoy ang Kamatayan at ang Daigdig ng mga Patay.

—Pahayag 16:2b; at 20:13b, 14a

MGA ANGHEL NI CRISTO AT MGA ANGHEL NI SATANAS

7

*Ang Banal na Anghel ng Diyos
na naglilingkod at nagiingat
sa mga Cristiano*

Sa kanyang mga anghel, ika'y
itatagubilin, saan mang dako ma-
paroon, tiyak kang iingatan.

—Awit 91:11

*Makapangyarihan ang Anghel ng
Panginoon kaysa kay Satan*

O purihin n'yo si Yahweh, ka-
yong mga anghel ng Diyos, ka-
yong mga nakikinig at sa kanya'y
sumusunod!

—Awit 103:20

Pagkaraan nito'y nagkaroon ng
digmaan sa langit. Si Miguel at

ang kanyang mga anghel ay na-
kipaglaban sa dragon at sa mga
kampon nito. Natalo ang dragon
at ang kanyang mga kampon....

—Pahayag 12:7, 8a

*Nangapahamak na mga Anghel
ay nagpasiyang madala ang tao
sa kapahamakan*

Maliwanag ang sinasabi ng Es-
piritu na sa mga huling araw ay
tatalikuran ng ilan ang pananam-
palataya. Susunod sila sa mga
mapanlinlang na espiritu at sa
mga katuruan ng mga demonyo.

—1 Timoteo 4:1

8 SINO AT ANO ANG KINAPOPOOTAN NI SATANAS

Sangbahayan—Biyaya ng Diyos

“Ang sa iyo’y magpapala ay aking pagpapalain, at ang sa iyo’y sumumpa ay aking susumpain; sa pamamagitan mo, lahat ng mga bansa sa daigdig ay aking pagpapalain.”

—Genesis 12:3

*Si Cristo (Diyos na nasa laman)
na dala ang kaligtasan sa
kanyang pagkatao na may
banal na dugo*

Galit na galit si Herodes... kaya’t ipinapatay niya ang lahat ng batang lalaki sa Bethlehem at sa palibot nito mula sa gulang

na dalawang taon pababa, batay sa panahong sinabi sa kanya ng mga pantas. —Mateo 2:16

*Salita ng Diyos—tinututulan
ni Satanas*

“Totoo bang sinabi ng Diyos...?” Ngunit sinabi ng ahas, “Hindi totoo iyan, hindi kayo mamamatay!” —Genesis 3:1b, 4

*Mananampalataya ipinanganak
sa Espiritu*

...Ang diyablo, ang kaaway ninyo, ay parang leong umuungal at aali-aligid na naghahanap ng malalapa. —1 Pedro 5:8b

Pinasasama ang evangelio sa pamamagitan ng kasinungalingan

Nagtataka ako kung bakit kay dali ninyong tumalikod sa Diyos na tumawag sa inyo sa pamamagitan ng kagandahang-loob ni Cristo at kayo'y bumaling agad sa ibang magandang balita. Ang totoo'y wala namang ibang magandang balita; kaya nga lamang, may mga nanggugulo sa inyo at nagsisikap na baguhin ang Magandang Balita ni Cristo.

—Galacia 1:6, 7

Tinutularan ang mga Manggagawa ng Diyos

Ang mga iyan ay mga huwad

na apostol, madadayang manggagawa at nagpapanggap na mga apostol ni Cristo. Hindi ito kataka-taka sapagkat si Satanas man ay nagkukunwaring anghel ng liwanag. —2 Corinto 11:13, 14

Himala ng Diyos, Laban sa kahangahangang kasinungalingan
(2 Tesalonica 2:9; Pahayag 13:13, 14; 19:20)

Sa sandaling si Cristo ang mamahala, kung tunay na sambahin Siya. Si Satanas man ay namamahala kung siya ay sambahin na isang diyus-diyosan.

O Yahweh, aming Diyos, may ibang panginoong sa ami'y nanguna!
—Isaias 26:13a

10 MAG—INGAT KAYO SA DIYUS-DIYOSAN

Mga anak, lumayo kayo sa mga diyus-diyosan. —1 Juan 5:21

“Huwag kang sasamba sa ibang diyos, maliban sa akin. Huwag kang gagawa ng imahen ng anumang nilalang na nasa langit, nasa lupa, o nasa tubig upang sambahin. Huwag mo silang yuyukuran ni sasambahin.”

—Exodo 20:3-5a

Ang ibang diyos ay kasuklam-suklam

Gibain ninyo ang lahat ng lugar na pinagdarausan ng pagsamba ng mga tao roon sa kanilang mga diyus-diyosan: sa itaas ng

mga bundok, sa mga burol, at sa lilim ng mga punongkahoy. ...Huwag ninyong tutularan ang kasuklam-suklam nilang gawain. Huwag na ninyong alamin pa kung paano sila sumamba sa mga diyos nila, baka gayahin pa ninyo ang mga iyon. Huwag ninyong gagawin kay Yahweh ang karumal-dumal na gawain nila sa pagsamba sa kanilang diyus-diyosan gaya ng pagsusunog ng kanilang anak bilang handog.

—Deuteronomio 12:2, 30, 31

Ang Dugo ni Jesus, nakapaglilinis ng kasalanan.

PAGSAMBA SA DIYUS-DIYOSAN

11

Ang kahangalan ng pagsamba sa diyus-diyosan

Tinalikuran nila ang katotohanan tungkol sa Diyos at pinalitan ngkasinungalingan. Sinambanila at pinaglingkuran ang mga nilikha, sa halip na ang lumikha, na siyang dapat papurihan magpakailanman! Amen. —Roma 1:25

Ang Diyos nami'y nasa langit, naroroon ang Diyos namin, at ang kanyang ginagawa ay kung ano ang ibigin. Ginawa sa ginto't pilak ang kanilang mga diyos, sa kanila'y mga kamay nitong tao

ang nag-ayos. Totoo nga at may bibig, ngunit hindi makapagsalita, at hindi rin makakita, mga matang pinasadya, di rin naman makarinig ang kanilang mga tai-nga, ni hindi rin makaamoy ang ginawang ilong nila.

—Awit 115:3-6

Ang parusa sa pagsamba sa diyus-diyosan

“...Mga sumasamba sa diyus-diyosan...ang magiging bahagi nila'y sa lawa ng nagliliyab na apoy at asupre. Ito ang pangalawang kamatayan.”

—Pahayag 21:8b

12 PAGESAMBA SA DIYUS-DIYOSAN AY KINAPOPOOTAN NG DIYOS

Winasak ng Diyos ang mga bansa dahil sa diyus-diyosan, Hindi dapat magkaroon nito sa inyong tahanan

Isa man sa kanila'y walang makakatalo sa inyo hanggang sa malipol ninyo sila. Sunugin ninyo ang kanilang mga diyus-diyosan. Huwag ninyong pagnanasaan ang mga pilak o gintong ginamit sa mga iyon sapagkat ito ang magiging patibong sa inyo dahil iyon ay kasuklam-suklam kay Yahweh. Huwag kayong mag-uuwi ng anumang bagay na kasuklam-suklam sapagkat iyon ang magiging dahilan ng inyong kapahamakan.

—Deuteronomio 7:24b-26a

Bakit marami sa mga pinili ng Diyos na mga bansa na pinaghaharian ng demonio sa panahon ni Cristo? Sapagkat ang kanilang mga ninuno ay sumamba sa Diablo!

Ang diyus-diyosan ang sinamba nila at pinaglingkuran, sa ginawang ito, sila ang nagkamit ng kaparusahan. Pati anak nilang babae't lalaki'y inihaing lubos, sa diyus-diyosan, mga batang ito ay ginawang handog. Kaya naman muli, si Yahweh'y nagalit sa mga hinirang, siya ay nagdamdam sa ginawa nilang pawang kataksilan.

—Awit 106:36, 37 at 40

LAHAT NG PANGGAGAWAY AY KASALANAN 13

“Ang mga mangkukulam ay dapat patayin.” —Exodo 22:18

“Wawasakin ko ang inyong mga agimat at mawawala na rin ang mga manghuhula.” —Mikas 5:12

“Kapag kayo’y naroon na sa lupaing ibibigay sa inyo ni Yahweh, huwag kayong gagaya sa kasuklam-suklam na gawain ng mga tao roon. Sinuman sa inyo’y huwag magsusunog ng kanyang anak bilang handog. Huwag kayong manghuhula, huwag gagawin ang ginagawa ng mga mangkukulam, ng mga ma-

nanawas, at ng mga sumasanguni sa mga espiritu ng namatay. Sinumang gumawa ng alinman sa mga ito ay kasusuklaman ni Yahweh na inyong Diyos. Pakatatandaan ninyo na iyan ang dahilan kaya niya itataboy ang mga nakatira sa lupaing pupuntahan ninyo.” —Deuteronomio 18:9-12

Pagsangguni: Ang paran ng panghuhula sa mga bagay na darating sa pamamagitan ng pagsusumamo sa espiritu ng mga patay ay-tinatawag nating karunungan itim.

PAGPAPAHAYAG NG MANGYAYARI SA HAHARAPIN SA TULONG NG DIABLO

*Ipinagbabawal ng Diyos
ang pagsangguni sa bituin,
mangkukulam, pagsugat at
paglalagay ng tanda sa sarili*

“Huwag kayong kakain ng anumang karneng may dugo. Huwag kayong manghuhula o mangkukulam. Huwag kayong maghihiwa sa katawan dahil sa isang namatay ni maglalagay ng tatú. Ako si Yahweh.”

—Levitico 19:26 at 28

...“Darating ako upang hatulan ang mga mangkukulam, ang mga mangangalunya, ang mga bu-laang saksi....” —Malakias 3:5b

Ang mga diyus-diyosan ay wala ng kabuluhan; ang pangitain ng mga manghuhula ay pawang kasinungalingan; ang mga panaginip nila’y walang katotohanan; ang kanilang sinasabi’y wala ring kabuluhan. Kaya’t mga tao’y parang tupang naliligaw, pagkat walang pastol na sa kanila’y umaakay. —Zacarias 10:2

Pagtuklas ng natatagong bagay: Pagpapahayag ng paparating o mga bagay na hindi kilala sa maling paraan.

Pangkukulam: Karunungan sa tulong ng masamang espiritu.

TALIKURAN ANG PAMAMARAAN NG PAGTUKLAS NG NATATAGONG BAGAY

15

*Sumangguni sa
masasamang espiritu*

Kapag may nagsabi sa inyo:
“Sumangguni kayo sa mga es-
piritu ng namatay at sa mga
manghuhula. Hindi ba dapat su-
mangguni ang mga tao sa kani-
lang diyos at patay para sa mga
buháy?” —Isaias 8:19

*Paggamit ng bahagi ng
katawan at mga larawan*

Pagdating ng hari ng Babilo-
nia sa sangandaang iyon, hihin-
to siya upang sumangguni sa
kanyang diyos-diyosan. Hahalu-
in niya ang kanyang mga palaso

sa lalagyan, at susuriin ang atay
ng hayop na panghandog.

—Ezekiel 21:21

Parusa sa mga gumagawa nito

Namatay si Saul sapagkat hindi
siya naging tapat kay Yahweh at
sinuway niya ang kanyang mga
utos; sumangguni pa siya sa ku-
makausap sa espiritu ng nama-
tay na sa halip na kay Yahweh.

—1 Cronicas 10:13-14a

Mapapahiya ang mga manghu-
hula, pagtatawanan ang kanilang
mga pahayag, sapagkat hindi na
sila sinasagot ng Diyos.

—Mikas 3:7

PARAAN KUNG PAANO GUMAWA ANG PRINSIPE NG SANGLIBUTAN

*Di mananampalataya naniniwala
sa nga tanda sa langit*

Ang sabi niya, “Huwag ninyong tutularan ang ginagawa ng ibang mga bansa; o mabahala sa naki-kitang mga tanda sa kalangitan, na labis nilang kinatatakutan.”

—Jeremias 10:2

Huwag magtiwala sa sulat o ano mang bagay tungkol sa “suerte” o isuko ang iyong sarili sa mala-demonyong tugtugin o ng masa-samang larawan. **“Sa buhay kong ito ang gawang masama’y di ko tutulutan”** (Awit 101:3). Itakwil ang

kayabangan, pagpapaimbabaw at ang patay na relihiyon.

**“Kahabag-habag kayo,.... Mga mapagkunwari! ...magaganda sa labas, ngunit ang loob ay bu-
lok.... Ganyang-ganyan kayo!
Sa paningin ng tao’y mabubuti,
ngunit ang totoo’y punung-puno
kayo ng pagkukunwari at kasa-
maan.”** —Mateo 23:27, 28

*Si Cristo lamang ang
nagpalaya sa atin sa kasalanan*
(Tingnan sa pahina 48 at 49.)

MAG-INGAT SA MGA BALITA NI SATANAS 17

Sa pamamagitan ng mga bulaang propeta

Subalit ganito ang sagot ni Yahweh: “Pawang kasinungalingan ang sinasabi ng mga propetang iyan; hindi ko sila sinugo, inutusan, o kinausap man. Ang mga pangitaing kanilang sinasabi sa inyo ay hindi galing sa akin, kundi pawang kathang-isip lamang nila.” —Jeremias 14:14

Sa pamamagitan ng pakikipag-usap sa mga patay

Tungkol sa Kanyang anak sinabi ni David, “Ngayong patay na siya,...hindi na siya makakabalik sa akin.” —2 Samuel 12:23

Huwag makipagusap sa mga masasamang espiritu, kundi utusan sila sa pangalan ni Cristo na umalis. Huwag magtiwala sa pagbasa ng kapalaran sa kamay, quija, gayuma, majia. “**Tanging si Yahweh ang nagbibigay ng tagumpay**” (Kawikaan 21:31b).

Wasakin ang mga idolo, mga aklat ni Satanas

Marami sa mga dating gumagamit ng mahika ang nagtipon ng kanilang mga aklat at sinunog ang mga ito sa harap ng madla. Sa kabuuan, ang halaga ng mga ito ay umabot sa limampung libong salaping pilak. —Mga Gawa 19:19

18 NILALANG NI CRISTO ANG KASARIAN (SEX) — GINAMIT NI SATANAS SA MALING PARAAN

*Kasarian (sex) ay nilikha para sa
pag-aasawa lamang*

Ang tadyang na iyo'y ginawa niyang isang babae, at dinala niya ito sa lalaki. Ito ang dahilan kaya iniwan ng lalaki ang kanyang ama't ina, nagsasama sila ng kanyang asawa, at sila'y nagiging isa. —Genesis 2:22 at 24

Dapat ituring na marangal ng lahat ang pag-aasawa at maging tapat kayo sa isa't isa, sapagkat hahatulan ng Diyos ang mga nakikiapid at nangangalunya.

—Hebreo 13:4

Sa mga may asawa, ito ang iniutos ng Panginoon, hindi ako: huwag makipaghiwalay ang babae sa kanyang asawa. Ngunit kung siya'y hihiwalay, manatili siyang walang asawa, o kaya'y muling makipagkasundo sa kanyang asawa. At huwag din namang hihiwalayan ng lalaki ang kanyang asawa. —1 Corinto 7:10, 11

(Basahin Roma 7:2, Marcos 10:9.)

Ang nagpapatuloy sa pagkaka-sala ay kampon ng diyablo, sapagkat sa simula pa'y nagkaka-sala na ang diyablo. —1 Juan 3:8a

ANG PAKIKIAPID AY PAGLABAN SA DIYOS 19

“Huwag kang mangangalunya.”
—Exodo 20:14

Kalooban ng Diyos na kayo’y maging banal at lumayo sa lahat ng uri ng kahalayan.

—1 Tesalonica 4:3

“Ang lalaking mangangalunya sa asawa ng iba ay dapat patayin, gayundin ang babae.”

—Levitico 20:10

Ang kasalanan laban sa sarili

...Ang katawan ay hindi para sa imoralidad sapagkat ito’y para sa paglilingkod sa Panginoon, at ang Panginoon naman ang

nag-aalaga sa katawan. Hindi ba ninyo alam na ang inyong mga katawan ay mga bahagi ng katawan ni Cristo? Iwasan ninyo ang imoralidad. Ang ibang kasalananang nagagawa ng tao ay hindi nakakasira sa katawan, ngunit ang gumagawa ng imoralidad ay nagkakasala laban sa sarili niyang katawan.

—1 Corinto 6:13b, 15a at 18

Pakikiapid: Ang pakikipag-ugnayan ng isang tao ng di pa kasal ay pakikiapid. Ang pakikipag-ugnayan ng isang taong kasal na ay pakikiapid.

20 NADAIG SI SATANAS SA PAMAMAGITAN ANG KAMATAYAN NI CRISTO

Dahil sa ang mga anak na tinutukoy niya ay tao, naging tao rin si Jesus at tulad nila'y may laman at dugo. Ginawa niya ito upang sa pamamagitan ng kanyang kamatayan ay mawasak niya ang diyablo na siyang may kapangyarihan sa kamatayan. Sa pamamagitan din ng kanyang kamatayan ay pinalaya niya ang lahat ng tao na buong buhay nila'y inalipin ng takot sa kamatayan.

—Hebreo 2:14, 15

*Pagkawalang kamatayan
natin kay Cristo*

Na nagligtas at tumawag sa

atin para sa isang banal na gawain. Ginawa niya ito, hindi dahil sa anumang nagawa natin, kundi ayon sa kanyang layunin at kagandahang-loob. Sa simula pa, ito ay ibinigay na niya sa atin sa pamamagitan ni Cristo Jesus, ngunit ito'y nahayag na ngayon, nang dumating si Cristo Jesus na ating Tagapagligtas. Winakasan niya ang kapangyarihan ng kamatayan at inihayag ang buhay na walang hanggan sa pamamagitan ng Magandang Balita. —2 Timoteo 1:9, 10

TAGUMPAY NG CRISTIANO LABAN KAY SATANAS 21

Ang diyablo, ang kaaway ninyo, ay parang leong umuungal at aali-aligid na naghahanap ng malalapa. Labanan ninyo siya at magpakatatag kayo sa inyong pananampalataya sa Diyos.

—1 Pedro 5:8b, 9a

Isuot ninyo ang buong kasuotang pandigma na kaloob ng Diyos, upang mapaglabanan ninyo ang mga pakana ng diyablo. Kaya't maging handa kayo. Ibigkis sa inyong baywang ang sinturon ng katotohanan, at isuot sa dibdib ang baluti ng katuwiran; isuot ninyo ang sapatos ng pagiging handa sa pangangaral ng Ma-

gandang Balita ng kapayapaan. Lagi ninyong gawing panangga ang pananampalataya, na siyang papatay sa lahat ng nagliliyab na palaso ng diyablo. Isuot ninyo ang helmet ng kaligtasan, at gamitin ang tabak ng Espiritu, na walang iba kundi ang Salita ng Diyos.

—Efeso 6:11 at 14-17

Kaya nga, pasakop kayo sa Diyos. Labanan ninyo ang diyablo at lalayuan niya kayo. —Santiago 4:7

Sapagkat ang Espiritung [Cristo] nasa inyo ay mas makapangyarihan kaysa espiritung [Satanas] nasa mga makasanlibutan.

—1 Juan 4:4b

Siya ang tinig ng Diyos

Ang Diyos...Ngunit sa mga huling araw na ito, siya'y nag-salita sa atin sa pamamagitan ng kanyang Anak. Sa pamamagitan ng Anak ay nilikha ng Diyos ang sanlibutan, at siya ang piniling tagapagmana ng lahat ng bagay.

—Hebreo 1:1a, 2

Namangha ang mga tao sapagkat nagtuturo siya nang may kapangyarihan, hindi tulad ng mga tagapagturo ng Kautusan.

—Marcos 1:22

Lumapit si Jesus at sinabi sa kanila, “Ibinigay na sa akin ang

lahat ng kapangyarihan sa langit at sa lupa.” —Mateo 28:18

Na umakyat sa langit at ngayo’y nasa kanan ng Diyos. Naghahari siya roon sa mga anghel at sa mga kapangyarihan sa langit.

—1 Pedro 3:22

Sapagkat si Cristo ay namatay at muling nabuhay upang maging Panginoon ng mga patay at ng mga buháy. —Roma 14:9

Binigyan niya ang Anak ng kapangyarihang humatol, sapagkat siya ang Anak ng Tao.

—Juan 5:27

SI CRISTO AY NAGSASALITA, GUMAGAWA NA MAY KAPANGYARIHAN

23

“Ngunit upang malaman ninyo na ang Anak ng Tao ay may kapangyarihan dito sa lupa na magpatawad ng mga kasalanan...” sinabi niya sa paralitiko, “Tumayo ka, buhatin mo ang iyong highaan, at umuwi ka na!” Tumayo nga ang paralitiko habang nakatingin ang lahat. Kaagad niyang binuhat ang kanyang highaan at umalis, kaya ang lahat ng naroroon ay namangha. Sila ay nagpuri sa Diyos. —Marcos 2:10-12a

Pinangisay ng masamang espiritu ang lalaki at sumisigaw itong lumabas sa kanya. Ang

lahat ay namangha kaya’t sila’y nagtanungan sa isa’t isa, “Paanong nangyari iyon? Ito ay isang kakaibang katuruan! Makapangyarihan niyang nauutusan ang masasamang espiritu, at sumusunod naman ang mga ito sa kanya.” —Marcos 1:26, 27

Binubuhay ang patay na may kapangyarihan

Nilapitan niya at hinipo ang kabaong at tumigil ang mga may pasan nito. Sinabi niya, “Binata, sinasabi ko sa iyo, bumangon ka!” Bumangon ang patay at nagsalita. —Lucas 7:14, 15a

NAGKAKALOOB SI CRISTO SA KANYANG TAGASUNOD NG KARAPATAN AT KAPANGYARIHAN SA LAHAT NG KAAWAY

Binigyan ko kayo ng kapangyarihang tapakan ang mga ahas at mga alakdan, at daigin ang lahat ng kapangyarihan ng kaway; at walang makakapanakit sa inyo. —Lucas 10:19

Tinipon ni Jesus ang Labin-dalawa at binigyan sila ng kapangyarihan at karapatang magpalayas ng mga demonyo at magpagaling ng mga may sakit. —Lucas 9:1

Tandaan ninyo ito: kung kayo'y nananampalataya sa Diyos at hin-

di kayo nag-aalinlangan, maaari ninyong sabihin sa bundok na ito, 'Umalis ka riyan at tumalon ka sa dagat,' at ito nga ay mangyayari. —Marcos 11:23

“Kung may magagawa ako?” tanong ni Jesus. “Mangyayari ang lahat sa sinumang may pananampalataya.” —Marcos 9:23

At kung ano ang di-masukat niyang kapangyarihan na kumikilos sa atin na mga nananalig sa kanya. Ang dakilang kapangyarihan ding iyon. —Efeso 1:19

KUNG PAANO ITATABOY ANG MASASAMANG ESPIRITU 25

*Pagwikaan, utusan sila sa
Pangalan ni Jesucristo*

Sinabi niya ito sapagkat iniutos ni Jesus, “Masamang espiritu, lumabas ka sa taong ito!” Tinanong siya ni Jesus, “Ano ang pangalan mo?” “Batalyon, sapagkat marami kami,” tugon niya.... Kaya’t lumabas nga sa lalaki ang masasamang espiritu at pumasok sa mga baboy.

—Marcos 5:8, 9 at 13b

Jesus...sinabi niya sa masamang espiritu, “Inuutusan kita, espiritu ng pagkapipi at pagkabingi, lumabas ka sa bata at huwag ka nang babalik sa kanya!” Nagsisigaw

ang masamang espiritu, pinangisay ang bata at saka lumabas. Nagmistulang bangkay ang bata kaya’t sinabi ng marami, “Patay na siya!” Ngunit ang bata’y hinawakan ni Jesus sa kamay, ibinangon, at ito’y tumayo. “Mapapalayas lamang ang ganitong uri ng espiritu sa pamamagitan ng panalangin.”

—Marcos 9:25b-27 at 29b

Subalit sinaway siya ni Jesus, “Tumahimik ka! Lumabas ka sa taong iyan!” At nang mailugmok ang lalaki sa kanilang kalagitnaan, lumabas ang demonyo sa kanya nang hindi siya sinasaktan.

—Lucas 4:35

26 ANG KATAAS-TAASANG PANGALAN NI JESUCRISTO

Dahil dito, siya'y lubusang itina-as ng Diyos, at binigyan ng pangalang higit sa lahat ng pangalan. Sa gayon, sa pangalan ni Jesus ay luluhod. —Filipos 2:9, 10a

At anumang hilingin ninyo sa pangalan ko ay gagawin ko upang luwalhatiin ang Ama sa pamamagitan ng Anak.

—Juan 14:13

Kasama ko ang aking asawa at mga anak sa pagbabalik sa Africa na may pananampalataya upang gumawa para kay Cristo, ako ay nagising isang gabi na nakita ko ang isang nakatatakot na espiritu. Nang ikilos ko ang aking tuhod sa kanya upang tingnan kung ang nakita ko ay totoo, itinulak niya ako na may kalakasan, at hinawakan niya ako sa leeg upang sakalin, at ako ay sumigaw ng tatlong salita, "Jesus, tulungan mo ako." Bigla na lamang siyang nawala, at ito ay hindi na naulit na ang nakaran. Kay Sata-nas ang pangalan ni Jesus ay kasindak-sindak, at sa lahat ng demonyo. Tumawag kay Cristong pangalan para sa kaligtasan (Roma 10:13).

Isang babae ang nagsabi sa aking asawa na ng siya ay nasa isang collegio, isang araw namasyal sila ng kaibigan niyang binata, ng malapit na sa isang daang-bakal pinagtangkaan siyang patayin upang pagkatapos

palitawing nasagasaan siya ng tren. Ng siya ay kanyang utusan sa **27** Pangalan ni Jesucristo nawalan siya ng lakas at lumakad ang lalaking ito sa unahan niya hanggang sa colegio.

Isa pang babae ang nagpatunay sa aming mag-asawa na noong siya ay kabataan pa ay binuksan niya ang kanyang tahanan sa isang pangkat ng mga manghuhula. Pagkatapos nito, ang masamang espiritu ay paulit-ulit na ginagalaw ang mga kasangkapan sa boong tahanan niya. Sa gayon kanyang itinaboy ang masasamang espiritu sa Pangalan ni Jesus at isinuko niyang lubusan ang sarili kay Jesucristo.

Huwag kailanman mahahabag kay Satanas o sa diablo, ang kanilang layon ay makuha ka sa kanilang panig sa halip na sumama sa Diyos. Ang isang matandang Cristiano na mayroon karamdaman at mahinang pangangatawan, ay nagsabi sa akin ng tungkol sa sinabi ni Satanas sa kanya, na parang sinusubok siya. Aking sinabi sa kanya na si Satanas ay puno ng pagdaraya at hindi nararapat pagtiwalaan kahit na isang salita na sabihin niya. Aking pinagwikaan si Satanas sa Makapangyarihang Pangalan ni Jesucristo. Nagkaroon siya ng kapayapaan kay Cristo sa loob ng limang linggo bago siya namatay. —Watson Goodman (1920-2002)

28 SI CRISTO AT SI SATANAS AY NAGKAKAIBA

Si Cristo at Manglalalang na Diyos

Sapagkat sa pamamagitan niya ay nilikha ang lahat ng nasa langit at nasa lupa, nakikita man o hindi, pati ang mga espirituwal na kapangyarihan, paghahari, pamamahala, at pamumuno. Ang lahat ay nilikha ng Diyos sa pamamagitan niya at para sa kanya.

—Colosas 1:16

Nagbibigay si Cristo ng

Liwanag at Kapayapaan

“Tatanglawan niya ang mga nasa kadiliman at nasa lilim ng kamatayan, at papatnubayan tayo sa daan ng kapayapaan.”

—Lucas 1:79

Ang Demonyo at si Satanas ay pumipinsala

“Ngunit kalagim-lagim ang daranasin ninyo, lupa... sapagkat ang matinding poot ng diyablo ay babagsak sa inyo! Alam niyang kaunting panahon na lamang ang nalalabi sa kanya.”

—Pahayag 12:12b

Nagbibigay ng kadiliman at pahirap si Satanas

Namatay rin ang mayaman at inilibing. Sa gitna ng kanyang pagdurusa sa daigdig ng mga patay, natanaw ng mayaman si Lazaro sa piling ni Abraham.

—Lucas 16:22b, 23

SI CRISTO AT SI SATANAS AY NAGKAKAIBA 29

Si Cristo ay Katotohanan

“Kung patuloy kayong susunod sa aking turo, kayo nga’y tunay na mga alagad ko. Maki-kilala ninyo ang katotohanan, at ang katotohanan ang magpapalaya sa inyo.” —Juan 8:31b, 32

Si Cristo ay sagana sa pag-ibig

Dito natin nalalaman ang pag-ibig: inialay ni Cristo ang kanyang buhay para sa atin.

—1 Juan 3:16a

Si Satanas ay Ama ng Kasinungalingan

Ang diyablo ang inyong ama!
At ang gusto ninyong gawin ay

kung ano ang gusto niya. Sa simula pa lang ay mamamatay-tao na siya. Hindi siya pumanig sa katotohanan kailanman, sapagkat walang puwang sa kanya ang katotohanan. Kapag nagsasalita siya ng kasinungalingan, nagsasalita siya ayon sa kanyang kalikasan sapagkat siya’y sinungaling, at siya ang ama ng kasinungalingan. —Juan 8:44

Nag-uudyok si Satanas ng Poot

“Kung napopoot sa inyo ang sanlibutan, alalahanin ninyong ako muna ang kinapootan nito bago kayo.” —Juan 15:18

30 SI CRISTO AT SI SATANAS AY NAGKAKAIBA

Nililinis ni Cristo ang kaluluwa

Ngunit kung namumuhay tayo sa liwanag, gaya niya na nasa liwanag, tayo'y nagkakaisa at ang lahat ng ating kasalanan ay nililinis ng dugo ni Jesus na kanyang Anak. —1 Juan 1:7

Nagbibigay si Cristo ng Buhay na Walang Hanggan

At ito ang buhay na walang hanggan: ang makilala ka nila na iisang tunay na Diyos, at si Jesu-Cristo na iyong isinugo.

—Juan 17:3

Pinarurumi ni Satanang ang kaluluwa

Huwag ninyong linlangin ang

inyong sarili; hindi maaaring tuyain ang Diyos. Kung ano ang itinanim ng tao, iyon din ang kanyang aanihin. Ang nagtatanim para sa sarili niyang laman ay aani ng pagkabulok mula sa laman.

—Galacia 6:7, 8a

Nagaakay si Satanang sa walang hanggang kamatayan

...Ang mapanirang damo naman ay ang mga kabilang sa Masama. Ang kaaway na naghasik ng damo ay walang iba kundi ang diyablo. ...ang mga damo ay... sinusunog....

—Mateo 13:38b-40a

SI SATANAS AT ANG KAPANGYARIHAN NIYA SA SANGLIBUTAN 31

Siya ang Prinsipe ng sanglibutan sa ngayon

Hindi na magtatagal ang pakikipag-usap ko sa inyo dahil dumarating na ang pinuno ng sanlibutang ito. Wala siyang kapangyarihan sa akin. —Juan 14:30

Siya ay Prinsipe. Kung hindi Mabuti ang Mangyayari sisihin siya.

Ang ganyang karunungan ay hindi galing sa langit, kundi makalupa, makalaman at mula sa demonyo. Sapagkat saanman naghahari ang inggit at makasariling hangarin, naghahari din doon ang kaguluhan at lahat ng

uri ng masamang gawa.

—Santiago 3:15, 16

Kailanman at mayroon siyang pagkakataon, winawasak niya ang kalayaan ng Pagsamba kay Jesus. Mindi niya masisira ang inyong pagibig kay Cristo.

At habang binabato nila si Esteban, nanalangin siya ng ganito: “Panginoong Jesus, tanggapin mo po ang aking espiritu.” Lumuhod si Esteban at sumigaw nang malakas, “Panginoon, huwag mo po silang pananagutin sa kasalanang ito!” At pagkasabi nito, siya’y namatay. —Mga Gawa 7:59, 60

32 ANTI-CRISTO—DARATING NA HARI NG SANGLIBUTAN

Ibinigay ng dragon sa halimaw ang kanyang sariling lakas, trono at malawak na kapangyarihan.... At binigyan siya ng karapatang mamahala sa bawat lahi, lipi, wika, at bansa.

—Pahayag 13:2b at 7b

Sinamba ng lahat ng tao ang dragon sapagkat ibinigay nito ang kanyang kapangyarihan sa halimaw. Sinamba rin nila ang halimaw at sinabi nila, “Sino ang katulad ng halimaw? Sino ang makakalaban sa kanya?”

—Pahayag 13:4

Mga kapatid, tungkol naman sa pagbabalik ng ating Panginoong

Jesu-Cristo at sa pagtitipon sa atin upang makapiling niya,... Huwag kayong magpapadaya kaninuman sa anumang paraan. Hindi darating ang Araw ng Panginoon hangga't di pa naganap ang huling paghihimagsik laban sa Diyos at ang paglitaw ng Suwail na itinakda sa kapahamakan. Itataas niya ang kanyang sarili at kakalabanin ang lahat ng kinikilalang diyos at sinasamba ng mga tao. Uupo siya sa Templo ng Diyos at magpapakilalang siya ang Diyos.

—2 Tesalonica 2:1a, 3-4

DIDIGMAIN NG ANTI-CRISTO ANG MGA BANAL 33

Magsasalita siya laban sa Kataas-taasan at pahhirapan niya ang mga hinirang ng Kataas-taasang Diyos. Tatangkain niyang baguhin ang kautusan at mga takdang kapanahunan. Ang mga hinirang ng Diyos ay ipapailalim sa kanyang kapangyarihan sa loob ng tatlong taon at kalahati.

—Daniel 7:25

Pinahintulutang magsalita ng kayabangan ang halimaw, lumapastangan sa Diyos, at maghari sa loob ng apatnapu't dalawang (42) buwan. Nilapastangan nga niya ang Diyos, ang pangalan ng

Diyos, ang tahanan ng Diyos, at ang lahat ng nakatira doon. Pinahintulutan din siyang digmain at lupigin ang mga hinirang ng Diyos, at binigyan siya ng karapatang mamahala sa bawat lahi, lipi, wika, at bansa. Sasamba sa kanya ang lahat ng nabubuhay sa ibabaw ng lupa, maliban sa mga taong ang mga pangalan ay nakasulat sa aklat ng buhay bago pa likhain ang sanlibutan. Ang aklat na ito'y pag-aari ng Korderong pinatay. “Ang lahat ng may pandinig ay makinig!”

—Pahayag 13:5-9

34 HUWAG SAMBAHIN ANG LARAWAN NG ANTI-CRISTO

*Tumulong ang mga Pinuno ng
Relihiyon sa Anti-Cristo ng
pagdaraya sa sanglibutan.*

Nalinlang niya ang lahat ng tao sa lupa sa pamamagitan ng mga kababalaghang kanyang ginawa sa harapan ng unang halimaw. Nahikayat niya ang mga taong gumawa ng isang larawan ng unang halimaw na nasugatan ng tabak ngunit nabuhay. Ipinahintulot din sa kanya na bigyan niya ng hininga ang larawan ng unang halimaw. Kaya't nakapagsalita ang larawan at ipinapatay nito ang lahat ng ayaw sumamba sa kanya. Nabihag ang halimaw,

gayundin ang huwad na propeta na gumawa ng mga kababalaghan sa harap ng halimaw upang dayain ang mga taong may tanda ng halimaw at sumamba sa larawan nito. Ang halimaw at ang huwad na propeta ay inihagis nang buháy sa lawa ng apoy na nagliliyab sa asupre.

—Pahayag 13:14, 15 at 19:20

*Tumanggi ang mga tao ng Diyos
sa diyus-diyosan*

“Kung hindi man niya kami iligtas, hindi pa rin kami maglingkod sa inyong mga diyos ni sasamba sa rebultong ginto na ipinagawa ninyo.” —Daniel 3:18

Sapilitang pinatatakan ng ikalawang halimaw ang lahat ng tao sa kanilang kanang kamay o sa noo, maging sila'y dakila o hamak, mayaman o mahirap, alipin o malaya. At walang maaaring magtinda o bumili malibang sila'y may tatak ng pangalan ng halimaw o ng bilang na katumbas ng pangalan niyon. Kailangan dito ang karunungan: maaaring malaman ng sinumang matalino ang kahulugan ng bilang ng halimaw, sapagkat ito'y bilang ng isang tao. Ang bilang ay animnaraan at animnapu't anim (666). —Pahayag 13:16-18

Darating ang Maligayang Araw sa mga ligtas

“Sila ang mga nanggaling sa matinding kapighatian. Nilinis nila at pinaputi ang kanilang damit sa dugo ng Kordero. Iyan ang dahilan kung bakit sila ay nasa harap ng trono ng Diyos at naglilingkod sa kanya sa templo araw at gabi. At ang nakaupo sa trono ang siyang kukupkop sa kanila. Hindi na sila magugutom ni mauuhaw man. Siya ang gagabay sa kanila sa mga bukal ng tubig na nagbibigay-buhay, at papahirin ng Diyos ang bawat luha sa kanilang mga mata.”

—Pahayag 7:14b-16a, 17b

36 LAHAT NG TAO NA SUMAMBA SA ANTI-CRISTO AY MAPAPAHAMAK, AT GAYON DIN ANG MAY TANDA SA KATAWAN UPANG BUMILI AT MAGBILI

At sumunod sa dalawa ang ikatlong anghel na sumisigaw, “Sinumang sumasamba sa halimaw at sa larawan nito, at nagpatatak sa kanyang noo o sa kamay, ay paiinum ng Diyos ng purong alak ng kanyang poot na ibinuhos sa kopa ng kanyang galit. Pahihirapan sila sa apoy at asupre sa harapan ng mga banal na anghel at sa harapan ng Kordero.

Ang usok mula sa apoy na nagpapahirap sa kanila ay patuloy na tataas magpakailanman. Araw at

gabi ay maghihirap nang walang pahinga ang mga sumamba sa halimaw at sa kanyang larawan, at ang mga natatakan ng kanyang pangalan.”

Ito’y panawagan na magpakatatag ang mga hinirang ng Diyos, ang mga sumusunod sa mga utos ng Diyos at nananatiling tapat kay Jesus. At narinig ko mula sa langit ang isang tinig, na nagsasabi, “Isulat mo: Mula ngayon, pinagpala ang mga namamatay na naglilingkod sa Panginoon!” —Pahayag 14:9-13a

PAGTATAGUMPAY LABAN KAY SATANAS, BAGO 37 DUMATING ANG GALIT NG DIYOS SA SANGLIBUTAN

Nakita ko rin sa langit...: may pitong anghel na may dalang pitong salot. Ito ang mga panghuling salot sapagkat dito matatapos ang poot ng Diyos. May nakita akong parang dagat na kristal na naglilibab. Nakita ko rin ang mga nagtagumpay laban sa halimaw at sa larawan nito, at sa nagtataglay ng bilang na katumbas ng kanyang pangalan.... Mula sa templo'y narinig ko ang isang malakas na tinig na nag-uutos sa pitong anghel, "Humayo na kayo at ibuhos ninyo sa lupa ang laman ng pitong mangkok ng poot ng

Diyos." —Pahayag 15:1-2a at 16:1 (Pahayag 16-18: ang pitong salot at ang bunga nito.)

Paghahari ng mga pinugutan ng ulo
...Nakita ko rin ang mga kaluluwa ng mga taong pinugutan dahil sa pagpapatotoo tungkol kay Jesus at sa pagpapahayag ng salita ng Diyos. Hindi sila sumamba sa halimaw ni sa larawan nito, ni tumanggap man ng tatak ng halimaw sa kanilang noo o kamay. Sila'y nabuhay at nagharing kasama ni Cristo sa loob ng sanlibong (1,000) taon.

—Pahayag 20:4b

38 ARMAGEDON, ANG DIGMAANG PINIGIL NI CRISTO

Tinipon ng Diablo ang mga Bansa upang Makilaban

Ang mga ito'y mga espiritu ng mga demonyong gumagawa ng mga kababalaghan. Pinuntahan nila ang lahat ng hari sa daigdig upang tipunin para sa labanan sa dakilang Araw ng Diyos na Makapangyarihan sa lahat. At ang mga hari ay tinipon ng mga espiritu sa lugar na tinatawag sa wikang Hebreo na Armagedon.

—Pahayag 16:14 at 16

Pinalaya ni Cristo ang Kanyang Bayan at ang Kanyang piniling mga tao, ang Israel

Sa araw na iyon, ang mga bansa

ay magkakaisa laban sa Jerusalemlen ngunit gagawin ko itong tulad sa isang malaking bato na mahirap galawin. Sinumang gumalaw nito ay naghahanap ng sakit ng katawan. Ngunit ang mga bansang iyon ay didigmain ni Yahweh tulad ng ginawa niya noong una. Ang mga lulusob sa Jerusalem ay padadalhan ni Yahweh ng kakila-kilabot na sakit; buháy pa sila ay mabubulok na ang kanilang laman, mata at dila.

—Zacarias 12:3 at 14:3, 12

Kung ang Diyos ay panig sa atin, sino ang makakalaban sa atin? —Roma 8:31b

SI CRISTO ANG KAHULI-HULIHANG HARI NG SANLIBUTAN

39

Ang Anti-Cristo ay Maghahari ng Ilang Taon, si Cristo ay Maghahari ng 1000 Taon at Magpakailanman

Sa halip, sila'y magiging mga pari ng Diyos at ni Cristo, at maghahari silang kasama niya sa loob ng sanlibong (1,000) taon.
—Pahayag 20:6b

Sa panahon ng mga haring iyon, ang Diyos sa kalangitan ay magtatatag ng isang kahariang hindi maibabagsak kailanman.
—Daniel 2:44a

Ang lahat ng bansa na iyong nilalang, lalapit sa iyo't magbibig-

gay galang; sila'y magpupuri sa iyong pangalan. —Awit 86:9

May matalim na tabak na luma-labas sa kanyang bibig na gagamitin niyang panlupig sa mga bansa. Mamamahala siya sa mga ito sa pamamagitan ng tungkod na bakal at paaagusin mula sa pisaan ng ubas ang alak ng poot ng Diyos na Makapangyarihan sa lahat. Nakasulat sa kanyang kasuotan at sa kanyang hita ang ganitong pangalan: "HARI NG MGA HARI AT PANGINOON NG MGA PANGINOON."

—Pahayag 19:15, 16

SI SATANAS AY NADAIG SA KANYANG PAKIKILABAN SA DIYOS

Pagkaraan nito'y nagkaroon ng digmaan sa langit. Si Miguel at ang kanyang mga anghel ay nakipaglaban sa dragon at sa mga kampon nito. Natalo ang dragon at ang kanyang mga kampon, at hindi na sila pinayagang manatili sa langit. Itinapon ang napakalaking dragon, ang matandang ahas na tinatawag na Diyablo at Satanas, na nandarya sa buong sanlibutan. Itinapon siya sa lupa kasama ang lahat ng kanyang mga kampon. At narinig ko ang isang malakas na tinig mula sa langit na nagsasabi, "Dumating na ang pagliligtas ng Diyos! Ipina-

malas na niya ang kanyang lakas bilang Hari! Ipinamalas din ni Cristo ang kanyang kapangyarihan! Sapagkat itinapon na mula sa langit ang nagpapatang sa mga kapatid natin, araw at gabi, sa harapan ng Diyos."

...Ngunit umulan ng apoy mula sa langit at tinupok ang mga kampon ni Satanas. At ang Diyablong nandaya sa kanila ay itinapon sa lawa ng apoy at asupre na pinagtapunan din sa halimaw at sa huwad na propeta. Pahihirapan sila doon araw at gabi, magpakailanman. —Pahayag 12:7-10; 20:9b, 10

KANINO ANG WALANG HANGGANG KAHARIAN? 41

*Ang Panginon at Cristo ay
Maghahari Magpakailanman*

Sa inyo ang kadakilaan, ang kapangyarihan, ang karangalan at ang pagtatagumpay sapagkat inyo ang lahat ng nasa langit at nasa lupa. Sa inyo ang kaharian at kayo ang dakila sa lahat.

—1 Cronicas 29:11

At darating ang wakas, kapag naibigay na ni Cristo ang kaharian sa Diyos Ama, pagkatapos niyang malupig ang lahat ng paghahari, pamahalaan at kapangyarihan. Sapagkat si Cristo'y dapat

maghari hanggang sa malupig niya at lubusang mapasuko ang kanyang mga kaaway. Ang kahuli-hulihang kaaway na kanyang lulupigin ay ang kamatayan.

—1 Corinto 15:24-26

Pagkatapos ay hinipan ng ikapitong anghel ang kanyang trumpeta at sa langit ay may malalakas na tinig na nagsabi, “Ang paghahari sa sanlibutan ay paghahari na ngayon ng ating Panginon at ng kanyang Cristo. Maghahari siya magpakailanman!”

—Pahayag 11:15

42 SI SATANAS AT ANG MGA DEMONYO, IYONG KAAWAY

Si Satanas ang sumisira ng kawatan, at kaluluwa, sa pakikiapid ng lalaki sa lalaki, pagpatay ng mga hindi pa ipinanganganak, Pinaghaharian ng demonyo

...Ang mga lalaki;...sa kanilang kapwa lalaki sila nahuhumaling. ...Kaya't sila'y paparusahan ng nararapat sa kanilang masasamang gawa. —Roma 1:27

Ang kinamumuhian ni Yahweh ay...mga pumapatay sa walang kasalanan.

—Kawikaan 6:16a, 17b

“Aalis muna siya't magsasama pa ng pitong espiritung mas ma-

sama pa kaysa kanya at papasok sila at maninirahan doon. Dahil dito, ang kanyang magiging kalagayan ay mas masama pa kaysa dati.” —Mateo 12:45a

Hanapin ang buhay na Diyos. Huwag tumawag sa “ibang diyos” upang malaman ang paparating, magbasa ng pagiiisip, at mapagaliling ang mga karamdaman.

Huwag ipailalim ang iyong sarili sa kapangyarihan ng ano mang espiritu na hindi sa Diyos at sa kanyang Espiritu. Sampalatayanan lamang ang Salita ng Diyos (Biblia). (*Basahin, Pahayag 19:13.*)

MARAMI ANG PARIRITO AT DADAYAIN ANG MARAMI 43

Ang anu mang turo na mag-aakay na papalayo sa makipot na daan ng kapatawaran, paglilinis, at katubusan sa pamamagitan ng Dugo ni Cristo ay mali at panglilinlang.

Sumagot si Jesus, “Mag-ingat kayo upang hindi kayo mailigaw ninuman! Maraming paparito sa pangalan ko at magpapanggap na sila ang Cristo, at marami silang maililigaw. Marami ang magpapanggap na propeta at ililigaw ang mga tao.”

—Mateo 24:4, 5 at 11

Sapagkat tulad ng madalas kong sinasabi sa inyo noon at ngayo’y luhaang inuulit ko, ma-

rami ang namumuhay bilang mga kaaway ng krus ni Cristo. Kapa-hamakan ang kahihinatnan nila sapagkat ang dinidiyos nila ay ang hilig ng kanilang katawan.

—Filipos 3:18, 19a

Mahalagang dugo ni Cristo ang Tumubos

Tinubos kayo hindi sa pamamagitan ng mga bagay na nasisira, tulad ng ginto o pilak, kundi sa pamamagitan ng mahalagang dugo ni Cristo. Siya’y tulad ng korderong walang dungis at kapintasan. Dahil kay Cristo, sumasampalataya kayo sa Diyos.

—1 Pedro 1:18b, 19 at 21a

*Pinaghaharian ng kasalanan at
maling simulain*

Lahat tayo’y naging marumi sa harapan ng Diyos; ang mabubuting gawa nati’y maruruming basahan ang katulad. —Isaias 64:6a

Galit sa espiritu ng pagsuway

Sinusunod ninyo noon ang masamang takbo ng mundong ito, at napailalim kayo sa pinuno ng mga kapangyarihan sa himpapawid, ang espiritong naghahari sa mga taong ayaw pasakop sa Diyos. Ang totoo, tayong lahat ay dati ring namumuhay ayon sa pagnanasa ng ating laman, at sumusunod sa mga hilig ng ka-

tawan at pag-iisip. Kaya’t sa ating likas na kalagayan, kabilang tayo sa mga taong kinapopootan ng Diyos. —Efeso 2:2, 3

*Pinamumunuan ni Satanas
ang di ligtas*

Kung may talukbong pa ang Magandang Balitang ipinapahayag namin, ito’y may talukbong lamang sa mga napapahamak. Hindi sila sumasampalataya sapagkat ang kanilang isip ay binulag ng diyos ng kasamaan sa daigdig na ito, upang hindi nila makita ang liwanag ng Magandang Balita tungkol sa kaluwalhatian ni Cristo na siyang lara-wan ng Diyos. —2 Corinto 4:3, 4

Ang bukid ay ang daigdig, ang mabuting binhi ay ang mga taong kabilang sa kaharian at ang mapanirang damo naman ay ang mga kabilang sa Masama.

—Mateo 13:38

Ang diyablo ang inyong ama! At ang gusto ninyong gawin ay kung ano ang gusto niya.

—Juan 8:44a

Ito ang dahilan kung bakit tayo ay dapat ipanganak na muli sa Espiritu ni, Cristo

Kaya't kung nakipag-isa na kay Cristo ang isang tao, isa na siyang bagong nilalang. Wala na ang dati niyang pagkatao, sa

halip, ito'y napalitan na ng bago.

—2 Corinto 5:17

Nakikinig sa akin ang aking mga tupa; nakikilala ko sila, at sumusunod sila sa akin. Binibigyan ko sila ng buhay na walang hanggan.

—Juan 10:27, 28a

Sumuko sa Panginoong Jesus

Ngayon na ang kaukulang panahon! Ito na ang araw ng pagliligtas!

—2 Corinto 6:2b

Subalit kung ipinapahayag natin ang ating mga kasalanan, patatawarin tayo ng Diyos sa mga ito, at lilinisin tayo sa lahat ng ating kasalanan, sapagkat siya'y tapat at matuwid.

—1 Juan 1:9

46 WALANG HANGGANG TAGUMPAY KAY CRISTO

Sino ang makapaghihiwalay sa atin sa pag-ibig ni Cristo? Ang kaguluhan kaya, ang kapighatian, pag-uusig, pagkagutom, kahirapan, panganib, o kamatayan? Hindi! Sa lahat ng mga ito, tayo'y lalong higit pang magtatagumpay sa pamamagitan niya na nagmamahal sa atin.

—Roma 8:35 at 37

Sapagkat napapagtagumpayan ng mga anak ng Diyos ang sanlibutan; at nagtatagumpay tayo sa pamamagitan ng pananampalataya.

—1 Juan 5:4

Gantimpala sa mga Dumaig sa masama

“Ang lahat ng may pandinig ay makinig sa sinasabi ng Espiritu sa mga iglesya! Ang magtatagumpay ay bibigyan ko ng nakatagong pagkain. Bibigyan ko rin siya ng batong puti na kinasusulatan ng isang bagong pangalan, na walang sinumang nakakaalam maliban sa tatanggap niyon.”

—Pahayag 2:17

“Sa magtatagumpay at tutupad ng ipinapagawa ko hanggang wakas, ibibigay ko sa kanya ang pamamahala sa mga bansa.”

—Pahayag 2:26

PILIIN MO KUNG SINO ANG IYONG PAGLILINGKURAN MAGPAKAILANMAN

47

*Mahahayag ng kasama ni
Cristo sa kaluwalhatian*

Yamang binuhay kayong muli na kasama ni Cristo, ituon ninyo ang inyong pag-iisip sa mga bagay na nasa langit na kinaroroonan ni Cristo, na nakaupo sa kanan ng Diyos. Ang mga bagay na panlangit ang isaisip ninyo, hindi ang mga bagay na panlupa. Si Cristo ang inyong buhay, at kapag siya'y nahayag na, mahahayag din kayong kasama niya at makakahati sa kanyang kaluwalhatian. —Colosas 3:1, 2 at 4

*O sumpain kasama ni Satanas
magpakailanman*

Sa daigdig ng mga patay doon sila matatapos, pati ang lahat ng bansang nagtakwil sa Diyos.
—Awit 9:17

Kung ang kamay mo ang nagiging sanhi ng iyong pagkakasala, putulin mo ito! Mas mabuti pa ang pumasok sa buhay na walang hanggan na putol ang isang kamay, kaysa may dalawang kamay na mapunta ka sa impiyerno, sa apoy na hindi namamatay. —Marcos 9:43

48 **ANG KAHARIAN NG LANGIT AY PARA SA IYO**

Tumawag si Jesus ng isang bata, pinatayo sa gitna nila at sinabi, “Tandaan ninyo: kapag hindi kayo nagbago at naging katulad ng mga bata, hinding-hindi kayo makakapasok sa kaharian ng langit. Ang sinumang nagpapakababa na gaya ng batang ito ay siyang pinakadakila sa kaharian ng langit.” —Mateo 18:2-4

Magsisi ng kasalanan

At dumating nga sa ilang si Juan na Tagapagbautismo na nangangaral, “Pagsisihan ninyo’t talikuran ang inyong mga kasalanan at pabautismo kayo, upang

kayo’y patawarin ng Diyos.” Nang ibinilanggo si Juan, nagpunta si Jesus sa Galilea at ipinangaral doon ang Magandang Balitang mula sa Diyos. Sinabi niya, “Dumating na ang takdang panahon. Malapit nang maghari ang Diyos! Kaya magsisi na kayo’t talikuran ang inyong mga kasalanan. Paniwalaan ninyo ang Magandang Balita!” —Marcos 1:4 at 14, 15

Kaya nga, magsisi kayo at magbalik-loob sa Diyos upang patawarin ang inyong mga kasalanan. —Mga Gawa 3:19

(Sa kabilang pahina ang karugtong.)

TANGGAPIN SI CRISTO NA IYONG TAGAPAGLIGTAS NGAYON

Sapagkat gayon na lamang ang pag-ibig ng Diyos sa sangkatauhan, kaya't ibinigay niya ang kanyang kaisa-isang Anak, upang ang sinumang sumampalataya sa kanya ay hindi mapahamak, kundi magkaroon ng buhay na walang hanggan.

—Juan 3:16

Ang iyong sarili'y sa kanya italaga, tutulungang ganap kapag ika'y nagtiwala. —Awit 37:5

Sumagot naman sila, “Sumampalataya ka sa Panginoong Jesus, at maliligtas ka, ikaw at

ang iyong sambahayan.”

—Mga Gawa 16:31

Ipahayag si Cristo lagi na
Kung ipahahayag ng iyong bibig na si Jesus ay Panginoon at buong puso kang sasampalataya na siya'y muling binuhay ng Diyos, maliligtas ka.

—Roma 10:9

Nagkakaloob ng kapangyarihan ang Diyos na maging Kanyang mga Anak

Subalit ang lahat ng tumanggap at sumampalataya sa kanya ay binigyan niya ng karapatang maging mga anak ng Diyos.

—Juan 1:12

Scripture texts are taken from the *Magandang Balita Biblia*, © 2012 Philippine Bible Society. Used with permission. All rights reserved.

Ang mga talata sa babasahing ito ay mula sa *Magandang Balita Biblia*, © 2012 ng Philippine Bible Society. Ginamit nang may pahintulot. *All rights reserved.*

Published in numerous languages by World Missionary Press, Inc., as God supplies funds in answer to prayer. **For questions or more information by country, visit: www.wmp-contacts.org**



World Missionary Press
PO Box 120
New Paris, IN 46553-0120 USA
www.wmpress.org

8-24

Read booklets online or by App
www.wmp-readonline.org
1406 Tagalog VJC